

【線上學習】李秉璋原作

神奇、神奇真神奇，上課毋使趕，交通毋會塞，想愛學麼个，就學麼个。先生任僱擇，時間任僱選，三光半夜乜做得，先生講啊生趣又分明。佢做得係學生仔个先生，乜做得做先生个先生，總講佢桃李滿天下，毋使準備拜師禮，毋使繳學費，你想愛學，佢就會教。

毋管你係聰明抑係蠢嘍¹，佢都收。佢無擇學生仔、無擇時間、無擇所在，單淨擇你，擇你想愛學个心。這係學習个革命，這係時代个轉變。來啊盡急、來啊盡遽，跔得著就大進步，就像脣口有仙人指點，武功大進。

馬桶毋曉得修理有人教，電鋸仔毋曉得發，一步一步來，訣竅教你知。網路線个接頭線路毋會排，有人教你色神愛分明，花刺必駁照順序，家啦伙俚又特別，最尾同佢夾啊去，接頭插下網路通。

雖然講一個銀角仔毋會響，毋過先生大部分都係自家在該唱戲，講啊嘴角全波、精神飽滿、笑頭笑面，蓋像都毋會瘰又有耐

心！一遍教毋會，再教一遍，你想愛學幾下到就學幾下到，學到你自家毋愛。

千里緣分一線牽，天下盡在僱彈指間。現代生活真鬆爽，有冷氣吹，毋使出門、毋使尖車，想愛仰仔學就仰仔學。就算係疫情時節，學校个線上教學，有息把仔無恁自由，毋過乜有人嶄然認真，一片聽課，一片查資料，正經係一踢三通，師傅帶入門，修行在個人。上課講義自家留，毋使抄，三個快速鍵一撚，滑鼠一點，講義隨存下來。

當日上課紀錄先生有錄製。驚你單淨係「用手機仔上課定定」，人毋知走啊哪仔去。故所先生上課會問問題，一半問，一半係在點名，看你心思有在無？認真上課个，回答無問題又會講頭就知尾，無用心个乜無問題，平平無問題，這個係毋知半件，故所無問題。連先生喊佢回答，佢就像在人間消失，無鏡頭、乜無回答聲，訊息欄項也無留字，故所佢正經係「用手機仔上課定定」。

線上學習，成就隨在人，每一個人都有揀擇个自由，愛對自家个人生負責。對自家未來正經个大方，就係同一切都貢獻在現下。今日个僱，成就天光日个僱。

¹ 蠢嘍：音 ngong deˊ；形容人笨拙魯鈍。

【火燒岫崗】李宜諭原作

在鄉下，鬧鬧熱熱個舊曆年一過啊核，又伸著恬靜個生活。毋過，行過消防隊時，會看著該一臺一臺個消防車駛出車庫停在路脣了。雖然看毋著無閒泊杈個身影，乜聽毋著緊張刺耳個警報聲，毋過，空氣裡背屏等息把仔愛停動個電波，一種神經擱纏個氣氛。

舊曆二月，係美濃人掛紙個時節。恁多年天時改常¹，春雨慢到，二月個岫崗燥絲絲仔，故所，對第一個拜六開始掛紙個臨暗，就會看著岫崗頂出現沖天個煙，接下來紅紅個火光就透出來了——阿姆啲，火燒岫崗了！消防車個身影像走相逐樣仔春一路出，警報聲在街路頂颯等過，一臺、兩臺、三臺……總概出動了。毋過，斷烏過後就難耐了，高不將換手腳溜掠個阿兵哥，拿等鑷仔、刀嫵同附近個竹頭、樹仔、草劈核——斷火路。

第二日打早，「轟……叮叮叮叮、叮叮叮叮」直升機個聲音就在天頂來來去去響無停了。「直升機去美濃湖舀水了啲！」美濃湖黏時鬧熱起來，大家共快號隻好位仔，坐下來定定仔看等直

升機在湖面舀水個景象。遠遠飛過來個直升機，會到美濃湖個時節，就會慢慢仔降下來，等到肚筭下背個大袋仔揆著水面，佢就會共快同袋仔向前拖一下再擲起來，滿滿一大袋個水就吊起來了；續等，同這恁大袋個水晃晃激激吊啊廣善堂背個岫崗頂，對半天高倒啊下，恁大袋個水隨化做一陣白白個濛煙散淨淨。

天頂頂直升機一轉又一轉，對打早飛到斷烏；山腳下消防車個水一管又一管緊射；岫崗頂紅紅個影跡對山前遶到山背、對山坪遶到山頂。更深夜靜個暗晡，總會聽著竹頭燒啊劈哩叭啦響個聲音，火屎就跔等風一哪飛，天光時節，家家屋屋個屋頂、大路項、田坵肚跌啊一哪烏烏個火屎。岫崗個火日夜燒等，山下個消防車、救護車、阿兵哥乜日夜掌等……下把仔伸著沖天個白煙，大家想愛轉擺²一下個時節，紅紅個火尾嘎又好恬恬仔窿啊出³，就恁呢一直愛燒到掛紙結束。

火燒岫崗對環境、對山林個破壞十分大。看著劈竹頭個阿兵哥分樹杈仔劃啊手同面都血流血著，實在分人毋盼得，掛紙個方式係毋係需要鄉親好好來思考、參詳呢？

¹ 改常：音 goi` song`；反常。

² 轉擺：音 zon` bai`；休息。

³ 窿啊出：音 liung` a cud`；鑽出來。

編號 3 號

【鷓鴣飛啊飛】張瑞玲原作

打早，日頭正對東片鷓鴣背¹个背項升趺起來，金哲哲仔又晟眼个金光射入天頂。佢踏等該臺一騎就響歸路个老腳踏車，來到佢个百果園，還話講今晡日日頭一出來就到，算蓋早了！無想著，正踏入園肚裡，隔壁種大梨个阿權哥就在該大聲咻了！「喂！日頭恁高了正到哦，敢做有事？」

唉！佢都恁早了，還輸佢，這阿權哥係歸暗晡毋使睡係無？做麼个做得七早八早就來到了？心肝還想緊，嘴項又毋肯認輸，就應佢：「無啦！毋係來做事，來看鷓鴣个啦！」

佢个林園在山龍圍等个窩壠肚裡，係堵著像今晡日恁呢个好天時，打早就會有三、四隻大鷓鴣，在四周圍个山嶺頂飛啊飛。

同阿權哥个嘴鼓都還言打煞，聽著遠遠个所在傳來「咻！咻！」个聲，鷓鴣出來了！阿權哥看著鷓鴣出來，做等个山園事頭也毋想做了，跔等一陣來搨接梨个工人，坐在佢工寮个涼影下欣賞這場大自然个表演。

看佢等閉開長長个翼胛、跔等燒氣，慢慢仔迂、定定仔飛，

緊迂緊高、緊飛緊遠，尾項變做天邊个一粒烏點，親像優雅个天頂王者，對天頂看佢等守護个土地。

下把仔，會看著佢等挺等胸脯、目盯盯仔停在脣口个樹極頂高，好恬恬仔無聲無說就舂一路下²，一矚目，轉身又飛往上，尖尖利利个爪項，夾等一尾挨著神頭个蛇哥伯，就一路「咻！咻！咻！」風神碌碌飛入密密个樹林裡背。

又有時節，看佢等在高高个天頂迂啊迂仔，忽然間，兩片翼胛一收，對天頂直直跌一路下，佢心肝肚還想等：「這隻鷓鴣這下定著穩死了！」毋過，看佢明明都會撞著地泥了，拓拓風翼胛一閉、利爪一伸，黏時在一矚目時間，厥利爪項就抓著一隻圓身還在扭啊扭个大老鼠，一轉身又飛啊半天高了！

歸陣人看鷓鴣表演看啊嘴擘擘，有人講：「難怪，在這個林園做恁久事頭，難得看著蛇哥，就係有這兜鷓鴣守護這片土地，歇在這仔个老嫩大細正有好安心生活啊！」

¹ 鷓鴣背：音 ieu poˋ zuiˋ；東勢東方山峰名，華語稱鷓鴣山。

² 舂一路下：音 zungˋ idˋ lu haˋ；往下俯衝。

編號 4 號

【甘蔗下个蟬仔】羅紫云原作

屋脣該墩白甘蔗，種幾下年了蓋大墩，剝核又會再綻筍，繼續煞猛生啊青柳柳仔，長目多汁，清甜好食。

每年大體對五月開始，日日到臨晝邊，就會有一大陣著等青衫、蓋靚蓋得人惜、頭大尾尖翼長个草蟬，細細仔像手指尾恁大隻仔，黏在這長長、青色个甘蔗葉下煞力牯叫，像在該啦歌哩曲樣仔，一等鬧熱。佢等總係唱等：「揸揸揸啲¹——揸揸揸啲——」清亮个歌聲，一直到下晝兩點零正會煞棚，完全無喊瘡。

草蟬下班，嫲牯蟬²跔等上棚。毋過，嫲牯蟬係黏在白甘蔗脣該墩榮榮个苦棟樹頂。佢算係最大隻个蟬仔，圓身著等一身烏色个西裝蓋亮線，大聲唱等佢等个愛戀歌：「蟬³——蟬蟬蟬！蟬——蟬蟬蟬！」佢等都背等一臺自家製造个放送機，該聲音放送啊盡遠都聽得著。佢心情好个時節，就阿腦佢等唱歌仔蓋好聽，心情毋好時就會試著佢等吵耳塞鼻了。但係一想著佢等看著這個世界，單淨短短幾日仔，就一等佩服佢等恁好膽、煞猛打拚个精

神，來完成唯一愛做个事情——傳宗接代，該就無麼个好怨嘆，乜會原諒佢等恁呢盡命牯緊叫了。

在這鬧熱个時節，佢兜張凳仔恬恬坐在甘蔗脣詳細聽，還會發現佢等毋係儘採唱个哦，曉得照順序、有條理，成時獨唱、成時合唱，像有人指揮樣仔。聲音有清亮、低沉、有時大有時細，發出个聲無多共樣，有个過尖有个過溫柔。其實，蟬仔有蓋多種，有一年、三年、五年、十三年、十七年，長年都屏在地泥下，麼个都看毋著，淨培養破土个熱情；在多年个等待中，同地泥底下个能量變做歌聲，拚出重重包圍，就係為著這短短幾日个自由。

佢心肝肚緊恁：這墩甘蔗無掖肥，毋知係因為聽了蟬仔熱情清亮个歌聲，正緊生緊高緊榮咩？嘎佢等，乜愛像蟬仔恁知足，知恩圖報，每日歡喜暢樂，這一生人就豐富精彩了！

¹ 揸揸揸啲：音 iam iam iam i；草蟬的叫聲。借字。

² 嫲牯蟬：音 ma^ˇ gu^ˇ sam^ˇ；此指臺灣熊蟬。

³ 蟬：音 sam^ˇ；此指臺灣熊蟬的鳴叫聲。

【虎頭蜂叮著記】李政暉原作

分虎頭蜂叮著了！

該日朝晨去山頂遠水做事，無看著路脣个竹林頂項有大蜂竇，一下無細義揆著該支竹仔，佢等就尋著佢。惡豺豺个蜂仔黏時就飛啊佢四周圍緊迂，對佢个圓身黏過來。佢揸著一隻正知係虎頭蜂就嚇啊盡命拈走，一片退一片揸圓身同頭那毛項个蜂仔。退到無蜂仔个所在正感覺頭那暈暈人怪怪，共快行歸屋下眠一下。

無幾久佢个頭那、圓身、手髀同脅下開始都會痛了：頭那感覺就像雲漂在天頂，又分人綁等，暈暈腫腫又纏纏，歸粒頭那暈暈無法度思考。左手个手巴掌腫啊像龜板，手痺痺、手指尾會伸毋會鉤；坐毋核又睡毋落覺，唉唉唧唧正式艱辛。係講有陰間，該時節个佢應該係歇在裡背。

落尾，分人送去病院掛急診。講著有十過隻个蜂仔叮著佢過後，醫生蓋認真對佢講：「普通來講，分虎頭蜂叮著二十針以上，就可能有生命个危險。這種蜂仔無解毒个血清，過傷重¹个有

¹ 傷重：音 song' dong；很嚴重。

時會引起過敏性休克抑係溶血个症頭，最好愛先通知你屋下个人。」醫生安排吊大筒射²、注射同抽血，交代佢先眠一下，係有麼个毋堵好愛黏時講。

等佢略略仔睡一下過後，感覺好加蓋多了，就想愛歸去。毋過，醫生愛佢奈加一下、觀察看啊，最好等屙个尿色正常；係講變烏暗泥色，就過麻煩，愛送大間病院。喚佢愛再等加一下，無麼个問題正做得出院。最尾，都無問題，醫生還係掛心个講：「開个藥仔愛照三餐食，有麼个無爽快就愛再共快過來哦！」

歸到屋下換衫褲个時節正知，總共叮著十六針，兩隻手髀發炎紅腫，一等癢。左手个手巴掌還係紅腫無感覺、頭那暈暈緊想愛睡目。睡到半夜盡命拈爪，癢啊險同皮掀開、爪入骨髓。食藥仔、擦藥仔無麼个效，堵好有人紹介講臺灣有一種牛樟菇做得強肝解毒，無定著對蜂毒有效。食過後，該暗晡正式有神，就好睡、毋會癢了。

這滿蜂仔叮个所在已經結疔了，看著這兜結个癩仔就再過一擺分佢想著：該時節个該兜蜂仔，佢一個人在山肚有幾危險。

² 吊大筒射：音 diau tai tung' sa；吊點滴。

112 年全國語文競賽客家語朗讀文章國中學生組（南四縣腔）

編號 6 號

【金黃色个旅行】曾雪蓉原作

旅行係一種盡好个休閒活動，做得分人个心情鬆爽，同最靚个回憶留下來。另外，旅行也係一種學習。有一句話講：「行萬里路，贏過讀萬卷書。」在旅行个時節，一路項看著个、聽著个，可能比在書項學著个還過精彩、生趣。

在印象裡背，佢最懷念个一擺旅行，係前幾年會八月半个時節，佢爺哀帶歸家人去花蓮遶寮。

佢等來到花蓮富里个六十石山，一路項感覺著花蓮个空氣特別好。一聲又一聲大鷓鴣歡喜又自在个歌聲，響在彎彎幹幹个山路項。佢等在高高个雲項迂去迂轉，閉等繃雄个翼胛，日夜在這片山頭緊遶。佢等係這片天地个山大王，也係保護者。

等阿爸同車仔停在忘憂亭，佢一下車就看著滿山坪个金針花開啊蓋鬧、蓋打眼。想起識在電視裡背看過一個紹介花蓮金針山个節目，講這仔係一個盡靚盡靚个地方，這句話正經一息都毋會差。佢企在這高高个涼亭項，看著歸片个山頭，變做金黃色个世界。就在間等泥香、野草花香个山風對面項吹過來該下，毋知仰仔，佢个心肝頭就有一種感動還有幸福个感覺，佢想這就係大自

然个力量。

阿爸講：「前人種樹後人涼，前人種竹後人搖。」這山頭个金針花，係盡多前人開山打林開墾出來个，故所來到這邊寮个時節，愛曉得珍惜，毋單淨同這美景用相片帶歸屋下，也愛同自家个地圾處理好，恁呢，年年正有靚靚个風景好欣賞哦！

臨暗頭个日頭，像一粒黃蠟蠟仔个柑仔掛在天邊个時節，本旦開到盡有精神个金針花，像約定好共下下班樣仔，全眨等目珠互相憑等，恬恬仔睡核了；難怪金針花又安到「一日美人」。佢跔等朝晨个日頭疏床，又在日頭落山時節，合起厥錫人个花蕊衫裙，做一個靚一日个美人。

時間過核蓋久了，有時節佢還係會恹起該擺「金黃色个旅行」，蓋像又聽著大鷓鴣歡喜个歌聲，盡久……盡久。

112 年全國語文競賽客家語朗讀文章國中學生組（南四縣腔）

編號 7 號

【盡風神个社團活動】劉純汝原作

兩年前正開學个時節，拿著社團選填單，哇！一拖拉牯¹呢！有服務隊、排球隊，還有童軍團、熱舞社……，該當時，毋知愛選哪個正好？欸？「西洋劍隊」！佢目珠一金，仰恁沙鼻、恁風神个名仔呢？「嗯，就選你了！」

入團隊个第四個月，佢總算有機會參加全國比賽了。換佢上場了——劍衫綁好勢，面落仔同手落仔也戴好勢，夾起電衫、跔正馬步，盡拚了！比賽一開始，佢拿等劍盡命牯溜步搶前進攻，使出蠻力拂啊拂仔。盲知，佢長刺佢撥擋、佢飛刺佢敲劍……，阿媽哀！總係分佢閃走淨淨，戰術也分佢看透透。佢个心肝肚蓋緊張，手腳亂核了，節奏也亂核了；對手盡命牯緊咻！咻！咻！咻，佢嘎緊拂空緊失分，輸啊盡慄！

佢一比啊煞，軟怠怠个雙腳拓拓風跪啊下，蹶命个「啊」一聲，就像氣凹凹仔个鬥雞，死齧齧仔²！原旦个自信怕係走到天頂同白雲搞麻人尋去了！

感心个劍隊陣，全部都行兼來——有人送涼水、有人撚背

囊、還有人同佢捕纏纏，教練也柔柔仔安慰佢講：「人生有時星光有時月光，你打啊蓋壁了，下二擺再加油！」目汁險險會忍毋核个佢，深深感受著佢等親像寒天个細日頭，佢心肝肚黏時燒暖燒暖。

人講「臺頂三分鐘，臺下十年功」，正經有影。聽起來恁風神个「西洋劍」，做起來無恁簡單。除了考反應、比體力，還愛動腦筋、想戰術。這兩年來，一擺又一擺毋係你贏就係佢輸个比賽，分佢學習著：仰仔面對失敗、仰仔面對媠斗个自家、面對問題、解決問題。佢蓋煞猛打拚，發揮客家人硬頸精神，練好基本功，抓捉要領——十年磨一劍！佢个劍術緊來緊進步了，武藝比得頭擺个花木蘭了！

「西洋劍」係源自十七世紀个歐洲，也係奧運項目之一，有分鈍劍、銳劍、軍刀三種。競賽員在比賽時節，企在鐵枋仔頂个兩片準備，用劍頭先刺著對手有效个部位就算得分，嶄然有速度感同爆發力。

「西洋劍」毋單淨培養專注力、思考力，還有觀察力同判斷力，還係「盡風神」个社團活動唷！

¹ 拖拉牯：音 to' la gu'；語源於日語「トラック」，卡車，此文形容很多之意。

² 死齧齧仔：音 xi` ngad` ngad` e'；表垂頭喪氣之意。

【 崁下該頭拉杌樹 】徐秀英原作

歇在鄉下，屋脊種幾頭仔番樣¹樹、牛眼仔、拉杌仔係蓋平常个，一到打子个季節，管佢有熟也無熟，係有食得个東西，細人仔絕對無放佢煞；毋過係吵著睡當晝个叔公叔婆大聲逐，該下晝就無戲好唱了。

佢屋下就在伙房个最尾析，崎仔溜啊下就係礮崁。崁下个圳溝係細人仔熱天个天堂，洗身仔、庠魚仔、捉蝦公、釣蛤蟆蚱仔，想得著个空頭，麼个都搵得著來搞。該頭拉杌樹就對崁下个石壁頂啞出來。

阿嬤蓋好食這頭个黃拉杌，見看著拉杌仔會食得該駁仔，佢就會怙等杖仔行兼來同佢這兜細孬仔講，青拉杌食了會屙硬屎，愛等佢黃了正好食。細人仔嘴項應講好，一群豺狗哪，哪管得著²佢等該張嘴，幾雙賤手扯得著个，全部都摘來塞牙縫了，除了生啊忒樹頂摘毋著个。阿爸就會拿竹篙極叉去夾下來，過硬个佢會自家食核，過熟个佢會放啊米缸裡背，翕加兩日正拿去阿嬤間項。無牙齒个阿嬤，糜啊糜仔，面項滿足个笑容，到這下佢都還

記得。

該頭拉杌樹頂，輒常就會有青絲仔飛來做竇。青絲仔毋驚人，佢等在樹下搞家啦飯仔，佢在樹頂高啾啾滾飛來飛去。細人仔雖然番綻，毋過從來毋識去撞過厥竇。過盤擎个會跋上石壁去算看啊，竇項有生幾多粒卵。一駁仔後，樹頂又加加幾隻得人惜个細鳥仔，就恁呢生生不息。

樹頂高也有膨尾鼠跳上跌落，還有共樣毋驚人个山狗太、狗嫫蛇趁上趁下。膨尾鼠尾仔絨絨，蓋得人惜，屋下食伸个果子也係果仁、果皮放到樹底下，佢等會輪等跳過來食。咕嚕嚕个目珠仁迂迂轉，就驚人來搶食个樣仔，實在還生趣。山狗太、狗嫫蛇就無恁得人惜了。因為厥皮膚有保護色，分樹梗抑係燥葉仔壅到共下个時節，一無注意就會分佢嚇著，故所佢盡惱山狗太。

恁多年過去了，崁下該頭拉杌樹早就無在了。毋過，該童年个回憶，哪久都恁香甜个放在佢个心肝肚。

¹ 番樣：音 fan' son；芒果。

² 管得著：音 gon` ded` diau~；管得住。